

# De Likgans

*Nau seg noch's van en Gans, sej wör et dömste Diir!  
Ek höbb et ok geglöw — bös ennekir  
Ek wat beläw — et leet torük al Joor,  
Bej en Begräwnis van en Jonggesell et wor.  
Pastor on Köster ginge vör de Lik,  
Duj koom ok Kösters Gans geschoote glik,  
On stell on fiirlech, wij sech dat gehört —  
An nimmes häd se sech gestört —  
Wakelt sej vör de Liklüj op  
On ging mät op de Kerkhof rop.  
De Köster had vörers gemerk et nit,  
Doch äs heij stoon blew — wor't so wit:  
„Wat ös dann dat?“ Wat woren dat vör Saaken,  
On wat soll heij dorbej nau maaken?*

Heij koß nit fott, heij hörd bej de Pastor,  
 Wat koom dij domme Gans dann noor?  
 Dij keek öm van de Sid so an,  
 Äs wenn sej segge woll: „Ek denk nit dran  
 Hiir wegdegoon, ek bliw hiir stoon!“  
 De Köster woos nit, wat heij maake soll,  
 Dij Saak wor öm doch stek te doll.  
 On äs de Lik ging op de Grawstät tuj,  
 Koom heij so langsam üt sin Ruj:  
 „Ksch!! Ksch!! . . .“ mik heij, on woll de Gans fortjagen,  
 Doch dat koß dij nit gut verdragen.  
 Sej woß nit, wat sej had gedoon,  
 Woröm soll sej dann nau weggoon?  
 Sej wor doch grad wij al dij Lüj so stell,  
 Verstun nit, wat de Köster well  
 Denn mik weer: „Ksch!! Ksch!! . . .“ on koom ok op ör tuj,  
 Doch duj verlor sej ok ör Ruj,  
 Flog üt de Rig on schnatterde nit schlech,  
 Doch fon sej op de Kerkhof sech terech;  
 In 'ne grooten Bog koom an et Graw sej an,  
 Äs Köster on Pastor ok woren dran.  
 Sej wor nau müskenstell — sej schnatterde nit meer,  
 Dat mot mej seggen ok tuj öre Eer.  
 Neschereg woord dat Kißfat sech bekeeken,  
 Gants dech wor sej an't Graw herangeschleeken.  
 De Köster stun op heete Koole,  
 Et liwsten dej heij sej versoole,  
 Doch stun sin Gans wij'n Pool so stiww,  
 On blew öm wit genug van't Liw.  
 Sej stun well vis à vis van den Pastor,  
 On lag de Kop so op een Or  
 On häd warhafteg so gedoon,  
 Äs wenn sej alles häd verstoon.  
 De Lüj, dij mußte sech et Lache so verbitte,  
 Sech op de Lippe bitte — öm nit hatt de kritte.  
 Ok de Pastor fil et en betje schwor,  
 On heij wor froo, dat heij nau färdeg wor.  
 De Gans keek trureg noch ens in dat Graw,  
 On wakkelt dann ok langsam af.  
 On trok so stellekes nor Hus.  
 Doch meent de Köstermann tum Schluß:  
 „En ander Kiir sal mej dat nit passiire:  
 Insperren dun ek sej, dat sej sech nit kann rüre!“